



Maniitsoq, 18. august 2009

Inatsisartut suleriaasiat § 36 imm.1 naapertorlugu Naalackersuisunut apeqqut.

Inuit assigiinngitsunik nalaataqarsimasut oqaloqatigineqarnissaminnik ikorfartorneqarnissaminnillu pisariaqartitsisut, pingaartumik aamma nunaqarfinni isorliunerusuniittullu eqqarsaatigalugit, Sumiiffiminniittunik inunnik oqaloqatiginnittartussanik“ pilersitsisoqarnissaa pisariaqartinneqarluinnarmat taakkunuunatigut pikkorissartitsinernik aallartitsisoqarnissaanik Naalackersuisut peqquneqarnissaanik Inatsisartut aalajangiiffigisassaattut Siumumit siunnersuutaasoq ukiakkut 2008-mi oqaluuserineqareerluni amerlanerussuteqartunit akuersissutigineqareerpoq. Suliniut sumut killippa? Aamma qaqugu aallartinneqarniarpa? (Inatsisartuni ilaasortaq Ruth Heilmann Siumut)

Nunatsinni inunnik isumaginnittunik ilinniarsimasunik amigaateqarnerujussuup nalaani inuit ikorfartorneqarnissaminnik pisariaqartitsisut amerlasuut qanoq iliuuseqarfigineqarnissaminnik saaffissaaleqisut amerligaluttuinnarput, pingaartumillu aamma nunaqarfinni isorliunerusunilu pisariaqartitsisoqartarpoq. Tamanna inatsisartuni ilaasortatut innuttaasunik ataatsimiititsisarnerni annertuumik pisariaqartitaanera ersersinneqartarpoq aaqqiissutissanillu ujartuiffigineqartarluni.

Annaasaqarneq, toqukkut qimagaaneq, atornerlugaaneq, timikkut tarnikkulluunniit annersagaaneq allatullu nalaataqarneq inuunermi atugassarititaasunut massakkut ilaapput.

Artornartunik nalaataqartut aggersarlugit ulluinnarni pisariaqartitaannik iliorfigineqartarnerat annikippallaarujussuarpoq, taamaammatt kingunerlutitsisarneq takornartaajunnaarluinnarpoq. Innuttaasut kissaatigaat ulluinnarni sumiiffinnilu oqaloqateqarsinnaanissaminnik periarfissaqarnissartik. Taamaattumik inuit tatiginartut aammalu piginnaassuseqartut misilittagaqartullu oqaloqateqarnissamut pikkorissartitaanermikkut piginnaatitaaffeqalersinnaagunik tassuunakkut ikorfartuisinnaalernissaat anguneqarsinnaammat.